

## ԴԺԱՐ ՏԱՐԻ

Վարի՛, գութան ջան, վարի՛,  
Շատ է դըժար էս տարի.  
Պապին տարան քյոխվի դուռ,  
Հարկ են ուզում.– տո՛ւր հա, տո՛ւր...

5 – Կըտամ, քյոխվա, փող չունեմ:

– Չունե՞ս, Շեկոն կըտանեմ:

– Ամա՛ն, քյոխվա, քեզ ղուրբան,

Շեկոն գընա թող գութան,

Գարնան անենք վար ու ցանք,

10 Կալը կասենք, բերենք տանք:

Գարունը ետ դառավ էլ,

Գութան լըծվեց – հորովե՛լ...

Վարի՛, գութան ջան, վարի՛,

Դատենք ցորեն ու գարի,

15 Տանենք ածենք քյոխվի փեշ,

Որ չըտանի մեր գոմեշ: